

7. maj 2024

UPA2024/48

**Nunatsinni piniartut aalisartullu piniakkanut aalisakkanullu ilisimasaasa katersorneqartalernissaat ilisimasaallu ilisimatusarnikkut atornerqarlutillu nalilersuutaasarnissaat siunertaralugu Pinngortitaleriffik pillugu inatsisartut inatsisissaata nutarterneqarnissaannik Naalakkersuisut peqquneqassasut Inatsisartut aaliangiiffigisassaattut suinnersuussut. Inatsit nutartigaq UPA2025-mi saqqummiunneqassaaq.**

(Inatsisartunut ilaasortaq Mikivsuk Thomassen Inuit Ataqatigiit)

Siumumiit inatsisartunut ilaasortaq Mikivsuk Thomassen Inuit Ataqatigiit siunnersuutaanut soqutigintartumut qutsavigaarput imatullu oqaaseqaateqassalluta.

Siunnersuuteqartup siunnersuumminut tunngavilersuina, aammalu siunnersuutaata siunertaa tunngaviatigut Siumumiit paasilluarparput.

Ilumoorpoq ilisimatuussutsikkut ilisimasat aallaavigalugit pisasseeriaaseq atugaasoq suli siammasissumik atuisut ilisimasaanik pingaaruteqartunik naleqqussarneqartuarluni ingerlajuarnissaa ukiuni aggersuni pisariaqartittuartaasaagatsigu, tassami ukiut silap allanngoriartorneranik nalaataqarfiusut atorpagut, taamaammallu issittumi uumasooqarnerup qanoq silap allanngorneranik eqqugaaratarsinnaanerata eqqumalluinnarfigineqarnissaa pinngitsoorsinnaanngilarput, tassanilu atuisut Aalisartut Piniartullu qitiulluinnartumik inissisimanerat avaqqussinnaanngilarput.

Sineriassuarput takisooq imaani nunamilu uumasorpasualik, imaanilu assigiinngitsunik aalisagarpassualik avatangiiseraarput, avatangiisitsinnilu uumassuseqartut issittumi najugaqaannarnissatsinnut tunngaviliisuusimapput, taamaattumillu ukiorpassuarni piniakkanut aalisakkanullu naleqqussarsimanitta, assigiinngitsunullu piffinnut avatangiisitsinni nerisaqariaatsitta assigiinngiaartut pilersissimavaat pissarsiarisinnaasatsinnik nerisassanik mamartorsuarnik inuiaassutsitsigut pigisaqalersimanerput, tamatumalu annaanagu siunissami ataavarnissaa pingaaruteqarluinnartutut isigaarput, tammatsaalineqarnissaalu suliniutigineqartuassasoq isumaqarfigalutigu.

Siumut aalisarneq piniarnerlu pillugit pingaartitsilluinnartuuvoq, taamaattumillu partiip anguniagaanni erseqqarissumik anguniagaqartuulluni; soorlu oqaaseqatigiit uku partiip anguniagaanni ersarissumik takuneqarsinnaapput:

- Piniakkanut killilersukkanut Nunap inoqqaavisa pisinnaatitaaffii piniarnermut ileqquusut ilisimasallu pisassiisarnermi pisasseeqqinnermi tunngavigineqassapput:

Aamma:

- Piniartut piffinni ilisimasaasa kinguaariinnut tammatsaaliorneqarnissaat Siumup anguniarpaa, tamanna piniartut oqalugiarnersigut, ilaatigullu pilisarnermut tunngasut soqutigisaqaqatigiinnut ingerlanneqartassasoq aqqutissiuunneqassaaq
- Taamatuttaaq aalisarnerup iluani ilisimasat assigiinngitsorpassuit iluatinnartut siammassissumik aalisakkat piffinni assigiinngitsuni periarfissaasut aalisartarnerisigut, aammalumi takkusimaartarnerinut tunngasunik, ilaatigullu piffiit avinngarusimasut allaat tikillugit ilisimasaqartut pigisaasa ilanngullugit sakkutut pigalugit ilisimatusarnermi atorneqartarnissaat kissaatiginartutut isigaarput tapersersorlutigu

Naalakkersuisut akissuteqarnerminni Aalisarneq pillugu siunnersuisooqatigiit, kiisalu Piniarneq pillugu siunnersuisooqatigiit ullumikkumiit annerusumik ilisimatusarnermi sulinermi peqataatinneqartariaqartumik oqariartuutaat tamakkiisumik Siumumiit taperserparput

Naalakkersuisut allannguutissatut siunnersuutaat siunnersuummut attuumalluinnartutut isigalugu tunngaviatigut taperserparput siunertamut pitsaasumut tikkuussisutut takusinnaagatsigu.

Taamatut oqaaseqarluta Naalakkersuisut allannguutissatut siunnersuutaat taperserlugu ataatsimiititaliamut susassaqartumut suliarilluarneqarnissaanik kissaateqarluta ingerlateqqipparput, siunnersuuteqartumullu qujaqqilluta.

Jens Kristian Therkelsen

Siumut